

文学典

文學典第一百十八卷

文學名家列傳一百六

明二十八 王思任

按列朝詩集思任字季重山陰人萬曆乙未進士知興平當塗青浦三縣袁州推官所至皆被鑄降稍遷刑工二部出爲九江僉事罷歸卒季重有僕官居通脫自放不事名檢性好謔浪居恆與狎客縱酒談笑大噱遇達官大吏疎放絕倒不能自禁好以詼諧爲文做大明律製奕律吾以爲必傳枚臯郭舍人之流也亂後跟蹤避兵猶負一棋局以往遂死於山中

傅巖

按浙江通志巖字野倩義烏人少孤貧及長好讀書鉅心作詩賦古文詞皆鑄理刻肌風瀾特妙天啟辛酉恩貢甲子舉於南雍崇禎甲戌進士得徽州歙縣舉循良第一後以讒去官及至國變後死於金華子三齡文齡發齡熙皆有文名初巖之遇禍刃將及熙年十四以身翼蔽其父刃著於頤而死發趨救矢洞右腋移時復甦見父弟死遂以手抉其創創裂而卒齡文奉其母歸杭蔡霍不充蓬

古今圖書集成
頭垢面者且十年而卒

林琦

按福建通志琦字鏡甫福清人崇禎丙子舉人三上公車不第慨然曰是烏足當吾意吾自有千古也迺閉戶著倫史鴻文一書上自姚姒下迄當代凡有關係名教者皆輯焉丙戌挈妻子栖海壇之君山結廬桃華塢上著雲水集以自娛有猾陳某者利島民財假名內附實欲圖霸島中以謀要琦琦大怒罵且毆之遂遇害方琦爲猾害時則有竊其顱埋者及琦妻子持喪舟歸挖掘不少動歟有島民奔告琦顱埋處遂徑得其元歸葬焉

馮復京

舒班

按蘇州府志復京字嗣宗常熟人少業詩爲諸生鉤貫箋疏著六家詩名物疏六十卷謂冠婚喪祭不當抗家禮於會典作遵制家禮四卷羅舊聞述先德作常熟先賢事略十卷族譜四卷年四十餘始見實錄謂通紀詳而野吾學裁而疎弇山炫博妄而謬憲章典則自鄙無譏作編年書駁正得失曰明右史略草創未就長子舒字己蒼肆力經史尤長於詩崇禎丁丑錢謙益瞿式耜爲奸民誣訐

事連舒下錦衣獄移刑部訟繫經冬誦讀不輟後爲邑令瞿四達羅織曲殺之士林痛焉所著有空居閣集懷舊集文穀詩紀次子班字定遠博學工詩亦精書法爲人落拓自喜奴視法度士被酒無聊輒就座中慟哭人相與怪之目爲二癡班自號云所著有鈍吟遊仙山居等集行于世

蔣臣

按安慶府志臣字子卿邑諸生少負才名風姿英爽上下天人諳練古今崇禎末詔徵賢良侍御楊四知以匡應踰年乃就徵會執政丁丑發策有不滿此舉者臣乃著書辯其一訛五誤十三謬一時名噪都下司馬范景文薦之至都撰足國三議議漕屯及鈔殊悉大司農倪元璐見其書乃上疏請授臣官上召對平臺臣敷對詳明侃侃數千言退乃繕寫所著書以獻命下授戶部司務甲申之變詣蠡倫堂自經爲所知救之遂間道歸史相國鎮淮屢書趣共事臣歎曰奈何以一羊將五狼乎爲因策淮上情形數事相國欲以監軍薦固辭之臣事親有孝行性警敏絕倫於書無不讀所著作流散者十九晚益佗僚不合時宜鬱鬱而卒

胡梅

按列朝詩集梅宇白叔生於闔閩少警悟能詩白皙美須眉口多微詞翩翩自喜晚而目眇家貧無子賣藥吳門市自號瞽醫以餘貲買石建二幢於天池華山以表歸心然其於詩結習愈甚東萊姜如須爲疏募刻之庚寅冬病卒撫其詩屬友人曰爲我請於虞山得數行爲序死可瞑矣徐元歎憐其意選其詩十餘首余錄而存之白叔嘗遊三山寓曹能始石倉園能始序其詩曰作詩先辨雅俗二字黃魯直云子弟凡病皆可醫惟俗不可醫然惟讀書可以勝之此卽談藝之法也余與白叔論詩譬如書者奕者謳者未有傳授罕窺古法而但本一己之聰明則必趨於邪路終其身不能精進世人往往畏難而樂其所易勢不可挽祇誤一世耳白叔之爲詩避俗套如湯火驅使己意如石工之礪礪巖簷師之下灘灘所未免者有斧鑿痕及喧豗聲耳予故不爲字剖句析輒用古人諷之以爲寧舒遲母急遽亦古法也白叔之詩未能參預格律而殊有詩意纖妍之語多從草次輪寫中迸出亦其性靈流逸去俗遠而去詩近也武塘夏雪子曰知白叔者遠有三山近有虞山三山者能始也余故錄能始之言以存白叔不獨見能始之知白叔亦以見能始之知詩也

按蘇州府志天麟字游初世居吳江爲農家至天麟始徙崑山幼好學家貧無力從師年十歲隨父之黎里有道士陸逸菴者朱戚屬也欲留寓讀書父不可仍攜歸越二日里人鬻薪於黎里天麟不告於家附舟往家人促之使還曰吾豈肯以農夫沒世乎逸菴亦勸學甚力延名師教之歷八寒暑而學成萬曆戊午以吳江沈天英舉鄉試出餘姚黃忠端之門後改姓名登崇禎戊辰進士授饒州推官公餘惟務講學所稱豫章四子皆師事之何心隱傳泰州之學爲江陵所害王世貞據爰書作傳人遂以游俠外之天麟讀其遺錄多所發明揚之衆毀之中在饒六年攝篆凡六所至以廉惠稱皆建專祠祀之甲戌行取入京戊寅上御中左門召考選諸臣問兵食之計天麟奏對稱旨授翰林院編修甲申正月奉差祭淮王中途聞京師陷一慟幾絕扶病歸里乙酉挈家入閩嗣入兩粵旣又欲入滇壬辰八月以病卒廣南西坂村所著道統治統二錄七觀齋集天文度辨六韜纂述母自欺編若干卷長子宿垣字日生年十六餽於庠次斗垣字月生俱隨父跋履瘴癘宿垣先其父一年病卒於龍英州斗垣後五年罵賊張勝遇害於崑明之德勝橋

陳天定

按福建通志天定字慧生龍溪人天啟乙丑進士以魏璫故不釋褐遽歸閉戶著書暇則與父老宣諭六言魏璫伏辜崇禎辛未始廷獻授行人以黃道周黨繫詔獄旋召入銓衡屏絕常例時稱開門吏部甲申遁跡深山不出後知命將終屏粒不食與親友賦詩而逝所著有陳氏說書及慧山詩文全集

葉崇震

按臨海縣志崇震字孺雷父誥郡庠名宿專門毛鄭之詩教授諸生從游甚衆性好酒日飲盡一石飲後說經聲鏗鏗然孺雷生而羸弱體不勝衣至性沉塞喜怒莫見其際家貧衡門兩版讀書穿壁引光爲文章絕去翰墨畦徑見知於司理金壇蔣楚珍引與長公太史超晰微訂與司理遷去甲申乙酉之際士躋褐趨時飛騰踴躍惟恐失後孺雷廢退里居扃戶山房夜央燈炮一蒼頭供春炊提三寸管縱評曆昌啟禎間天時人事之故人爲一傳傳爲一贊剛腸熱血沾濡楮毫旣而兵火相尋一椽莫棲雙親旣沒負土爲墳創鉅痛深竟以抑沒所著書散佚不傳

程智

按休寧縣志智字子尚號雲莊會里人幼讀書以聖賢爲分內事弱冠深究易理至忘寢食聞善易者必就正焉高大中丞攀龍亟稱之入徑山閉關三年一日羣疑悉破曰一四天地之元二三天地之交佛氏知天地之元意主無生道教知天地之交意主長生至參兩倚數用六用九大衍五十則惟儒者能之此生生之謂易也著有一四二三參兩諸說及大易宗旨中庸旨說諸書智爲文章浩瀚奔放一瀉千里深得南華華嚴三昧其與金正希論孝書尤爲世所傳誦云

毛晉

按蘇州府志晉原名鳳苞字子晉常熟人父清以孝弟力田起家爲鄉三老楊忠烈漣爲令時每有大役倚以集事者也晉奮起爲儒游錢謙益之門強記博覽通明好古構汲古閣藏書數萬卷刻十三經十七史古今百家書手自讎校恆廢寢食世皆爭購之爲人孝友恭謹又好施予推官雷某贈之詩曰行野漁樵皆謝賑入門童僕盡抄書爲實錄云所著有和古人詩和今人詩野外詩虞鄉雜記隱湖小志海虞古今文苑毛詩名物考宋詞選明詩紀事明詞英華明僧弘秀集隱秀集國秀閣秀集共若干卷卒後錢謙益誌其墓

唐烈

按德安府志烈字仲駿穎悟過人幼以童子試第一補諸生學博洽工詩古文屢舉不第乃授徒教人先行業而後文章崇禎壬午同邑魯鑑督學雲南故烈授經士也與俱往時黃岡何閔中亦官滇與烈唱酬甚適會世亂從鑑歸僑滯黔陽竟卒於黔有天馬山房集滇南集若干卷兵火散軼不存

劉季鑛

按江西通志季鑛字安世殿撰同升第四子壬午拔貢性孝友詩文千言立就殿撰公卒於虔溢米不入口哭踊絕而復甦者三喪事畢杖策游楚粵卒以間關盡瘁死聞者哀之所著有皆園詩文集

朱孔彰

按江西通志孔彰高安人讀書嗜古不求聞達喜遊江湖間所至多吟咏晚年家居循循禮法跬步不苟所著有繁蕪集湯光烈嘗題曰一千里外無吟客五百年前有謫仙

劉源瀟

按江西通志源瀟高安人好古勤學博覽羣書尤長於詩詞治家有禮法高冠闊步人望而敬畏焉

先是本縣官糧與民糧均派起運百姓苦之源瀟間關五千里伏闕奏請以官糧納輕折民困始蘇至今便焉所著有蘇齋稿行於世

欽楫

按蘇州府志楫字遠猶吳縣人四歲能誦詩既長洞達六經得儀禮古註窮探之以註疏多不合經文乃旁搜漢以來諸儒考覈訓詁彙輯裁正之作圖解少學畫於劉原起高古有宋元遺意以畫力食他餽遺不受天資狷介喜與人言忠孝事終身不娶常聞婦人聲必引避他所久居僧寮不近市宅其違絕人情如此然友愛諸弟少鄰幼遭寇亂攜負逃匿不惜身命比全活以其學授之年六十病數日夢爲友生布席講禮寤以告諸弟言終而卒

繆慧超

按蘇州府志慧超字子上吳縣人參政國維再從子也少喪父事母甚孝家貧好讀書明天啟時吳令某因感國維德以超名薦之學使者臨試托病不入人以此高之爲文好用左國試輒不利棄舉子業專心於詩崇禎壬午崑山方某爲廣東電白知縣其婦翁超之世父也方某邀婦翁父子及超

同之官後值王師定兩廣超從方某匿電白山中多吟咏記述世父客死子從間道先歸超於盜賊充斥中扶其櫬以歸人以此義之與方某周旋患難間貲財相托不差銖黍人益歎服超亦稍有歸橐不治生產日夕召故人飲酒不數月金盡貧如故詩法景陵後入唐人每以孟東野賈閬仙自許性好山水晚年隱於鄧尉每歲游洞庭諸山俱有紀游作其所著詩文曰蝸廬集行於世

張文峙

可度

按江寧府志文峙字紫淀莊節之弟七歲喜讀楚詞弱冠貫穿經史詩賦古文泉流飆發辨覈掌故務爲根柢有用之學字內奇才劍客多集舊京班荆抵掌觴解錐畫皆畏服去流寇震驚鳳泗范大司馬景文參贊留務咨詢戰守之策文峙臚陳古今畫地聚米撰南樞志一百七十卷圖扼塞覈兵餉稽營陣布置南北數千里列如指掌莊節殉難徒步逆其喪中年坎坷貧甚僞篤友誼錢太史謙益爲之傳曰文峙慷慨有大志孤行側出歌石爛而憂天墜非時人所知也傳曰士尙志文峙以之家於鍾山之陽圖書滿架聞蘊地之令擲筆徑出墊巾壞服往來棲霞雨花間出無僮入無廬冬無裘夏無葛衰不杖病不藥行忘之游忘反行吟野哭嘻嘻咄咄癸巳冬積雪拒門擁衣寒臥咏雪滿

山中之句賦詩四章歲暮懷友十六章纂明布衣詩一百卷踰年屬疾告其弟可度曰晚年讀楞嚴般若悟成住壞空之理病中有神告我是身清淨勿以感懷錯亂任運往耳所謂強力不返得正而斃者也傳曰士守道文峙以之弟可度字季筏至性孝友不避險阻晚棲心禪觀大有證悟卒於閩之客舍神識不亂自爲行述

蔣山

按廣西通志山字靜叟恭城人其先世廣陵人未冠爲名諸生司理蔣屏凝子也屢舉不第棄舉子業徜徉山水間喜讀書非沉疴不廢吟咏明末避亂藏書石洞泣謂人曰某棄富貴甘貧賤嘔心血而成書使後世有傳之者死且不朽矣與海內諸名公爲詩友所著有響遠堂南遊草爨桐蕉鹿詩文若干卷奇才大志特出一時明季靖藩監國徵之不赴未幾卒爲後學所宗

陳宗之

按蘇州府志宗之字玉立長洲人祖光祖父繼華皆舉人宗之攻苦力學崇禎癸酉以春秋舉於鄉癸未中會副授推官以親老辭歸性端方沉篤邃於古學博洽多聞詩文無纖靡之習所著有持論

十集古樂府存瓠園賦草山志鷗吟雪籟吳鈴等書

楊彝

按蘇州府志彝字子常常熟唐墅人萬曆之季制舉文字沿習子書佛乘彝與太倉顧夢麟搜討傳注一以程朱爲準天下翕然從風稱楊顧學所著有說約文徵等書累困場屋以歲貢授松江訓導作興人材甚廣明末薦授都昌縣以道阻弗克赴任隱居教授生徒日進年七十七卒

許楚

按歙縣志楚字芳城號青巖潭渡人少爲諸生不規規經生業獨留心東京以後之作張太史西銘嘗稱曰新安山水甚佳今更得一許子將矣一時吳中名宿或折節下之會玉步已更跳身吳越間每過山川城郭見兵燹荒殘風塵昧昧則廣詢耆舊訪羅孤忠逸尙端牘抽札以揚風烈至其觸目感懷歌聲所激往往清絕已而坐鄱陽累執赴皖城親黨皆危之楚志氣揚揚如平時過大風嶺題壁曰四海知張儉千秋憶孔褒至皖慷慨陳詞撫軍趣釋其縛及歸杜門著書款求文字者屢滿戶外常欲與汪溥續新安文獻志未就而黃山新安江兩賦尤不讓兩都焉卒之日索常執玉柄塵尾

手之端坐而逝所著有青巖文集南村草堂集遺民集新安外紀藝文幸存錄士窮錄金石錄廣輿記補諸書

江益亨

按歙縣志益亨字德裕叢睦人少負才名與汪扶光江文石江聯季友善會甲申之變諸人各成志益亨南走閩粵歸老秣陵號鍾山逋客博極羣書手錄徑尺著鳶飛魚躍集近仙居種鱗館南華註詩文各種

楊必祐

按福建通志必祐字可庇晉江人爲諸生有聲品行端莊不苟取與丙戌後絕意進取以詩文自娛爲友人招遊伊洛因得徧觀古蹟名勝輒題咏見志

王寢大

按合肥縣志寢大字幼章合肥人事繼母撫異母弟五人六十餘年內外無間言爲諸生時博極羣書與婁東張溥張采爲友領袖十五國名流丁卯貢入成均司成侯木菴倪鴻寶待以國士庚午領

鄉薦乙亥賊寇肥北門女城陷衆潰寢大齋火藥冒矢石以捍禦守者復集城賴以存丁丑成進士
皖撫史可法雅重其人一時機務悉諮以行兩知縣事以廉能卓異報最遷南銓曹旋告歸寢大自
奉甚儉而喜施予壬午後三遇旱蝗捐貲以賑規畫甚善歸里後結廬河干手一編寒暑無間者二
十五年布袍芒鞋溷跡樵牧中怡然自適嘗謂史爲古今第一要義而春秋史法之祖通鑑綱目羣
史之會故二書爲一生精力所萃有春秋說數十萬言史綱抄十餘萬言著明末條議當變革者十
餘事

謝泰宗

按寧波府志泰宗字時望崇禎十年進士知番禺縣番禺多盜泰宗捕得窩盜者要人爲之解且以
千金囑獄卒按誅之粵有藤入口立死奸民每以此誣人泰宗痛絕之其風乃息嗣曾蘇鳳字者稱
王犯境督撫檄泰宗爲南路監軍出奇計擒之陞工部主事尋謫福建幕僚踰年陞南安推官擢兵
科給事中解組歸家居三十年日著書賦詩自遣種菊花數百本以晡時會客客數至弗厭也飲必
至醉乃已率以爲常明發客往過之則已櫛沐手一編矣著有轍音四卷燕囊三卷花歸百咏四卷

南征志載六卷警餘三卷菊醉吟二卷天愚山人文集六十卷詩集四十二卷

沈堯章

按浙江通志堯章字佩彝仁和人端臨曾孫崇禎丙子舉賢書雅不好戲行坐間率正身端拱矜嚴自持嘗慕范希文之爲人著先憂後樂論以見志而於易學獨粹家故有池臺復疊石蔬圃栽花藥而蒔菊尤多嘗被酒對花太息曰晚香晚香蓋自況云

王臨

按黃州府志臨字泰生其先三世同居以孝義聞邑令蔡洪輝旌其門臨生純孝居喪三年不入寢過墓必泣家貧好學諷誦不輟或曰飢乎曰吾有書故俗稱王生代飯書嘗作禹貢圖及河圖考以文名崇禎末避寇居江南沙村沙村山後懸巖如屏墨書梅山旁識范純仁題臨遂作梅山記時李自成敗餘賊南奔臨被獲有渠魁異之因釋焉後從江上歸避雨村店有婦棄繡筐而走就視乃廣濟舊志殘缺失次臨慨然修輯旁搜博訪數年成書縣志之存臨之力也

奚榮先

按貴州通志榮先平越人官學正品行端方博學好古撰郡志二十卷後之作者多採擇焉

劉醇驥

按黃州府志醇驥字千里性方正簡塞貧而好學博窮圖史每歎宋元以來文習日卑辱因奉左國史漢爲繩矧文章爾雅典重一時賢傑無不知有劉千里者得其傳記碑銘莫不以爲美晚年挾策遊京師無所遇歸老山林著述自任有芝在堂集行世

方南龍

按蘇州府志南龍字起潛崑山人鳳元孫事母能養志不使知貧急兄弟之難弗惜以身家殉幼卽工詩讀書於新濱里數年不入城市爲制藝出入風雅補邑諸生值明季無意於進取鼎革後遂棄舉子業野服幽棲日與同志唱酬論文以爲樂性耿介親戚中有富貴而不好禮者雖同里絕不往來年八十二無病而卒所著有竹居詩稿來玉堂詞稿輯錄詩餘圖譜

林佳璣

按福建通志佳璣字衡者莆田人爲郡諸生常鬱鬱不樂喜吟詩值閩中擾亂去遊吳越與諸名士